



UKA16/57 & 143
25. oktober 2016
Múte Bourup Egede

Naalackersuisut namminersortunngorsaannermut isumalioqatigiissitamik pilersitsinissaannut, pisortat suliffeqarfiit tamakkiisumik tamakkiisumiinngitsumillu pigisaannik misissueqqissaartussanik siunnersuuteqartussanillu suliffeqarfiit sorliit namminersortunngorsarnerinit iluanaaruteqartoqarsinnaaneramik suliaqartussanik aalajangiiffigisassatut siunnersuut. Misissuineq UKA 2017-mi Inatsisartunut tunniunneqassaaq.

(Inatsisartunut ilaasortaq Poul Hansen, Demokraatit)

Inatsisartut aaliangiiffigisassaattut siunnersuut Naalackersuisut peqquneqassasut Naammassisaqarsinnaassuseqarnermik (produktivitet) ataatsimiisitaliarsuarmik pilersitsissasut.

(Inatsisartunut ilaasortaq Per Rosing-Petersen, Attaviitsoq)

Inuiaat kalaallit nunassissimavugut nunami isorartuumi siammasissumik inuuffigissallugu toqqarsimasatsinni. Nunatsinni siammasissumik najugaqarnitta takutippaa inuiattut nunatsinnik nakkutiginnikkumanerput, nunattalu tunniussinnaasaanik atorluaajumanerput. Taamak najugaqariaaseqarnerput illersugassaraarput, siuarsagassaraarput periarfissanillu ineriartortitsivissaraarput, oqaannarata uku pappiaqqani kisitsisit malillugit akilersinnaangillat matuinnarniartigit.

Inuit Ataqatigiit inassutigerusuppaat nunatsinni suliffeqarfinnik inuiaqatigiit pigisatsinnik namminersortunngorsaannissaq tunuarsimarfigineqassasoq. Pingaaruteqarpormi inuiaqatigiittut suliffeqarfiit pigisatta namminersortunngorsarnissaanik alloriartigata oqalliseqqaarnissarput. Suliffeqarfiutigunukua qanoq piniarigut?

Namminersortunngorsaanninermi siammasissumik oqallinnitsigut tungavissalimmik suna ataatsimoorfigisinnaanerlutigu ujartoqqaartariaqarparput, suliffeqarfiutittalu nunatsinni qanoq inissisimanissaannik ujartueqatigeeqqaartariaqarpugut. Namminersortunngorsaaniarnermi aaliangiipiloorata mianersortumik ingerlatsinissarput pingaaruteqarluinnarpoq. Suliffeqarfiimmi pigisagut siammasissumik inuusaaseqarnertinnik ilaatigut attasseqataapput nunatsinnilu isorartuumi inuuniarnitsinnik oqilisaasseqataallutik.

Isumaqarput suliffeqarfiit Namminersorlutik Oqartussanit pigineqartut suli pisariaqartikkigit. Nunatsinni naligiinnerusumik inuunissatta qulakkeernissaa pillugu suli suliassaqaqaagut. Inoqarfiimmi tamaasa inuuffigiuminartikkusukkutsigit assersuutigalugu nukissiutitigut, assartuinnermi, angallannermi, attaveqatigiinnermi, ineqarnermi, aalisarnermi piniarnermilu piasarisat tulaallugit nioqqutissiarineqarsinnaanerannut suliffeqarfiutigut qulakkeerinninnissamut peqataasut assigiinngitsutigullu naleqqussaannissamut atorluarsinnaasagut namminersortunngorsaaniaannarluta sapangiinnavissinnaangilagut.

Inuit Ataqatigiit Inatsisartunut ilaasortap Poul Hansenip aaliangiiffissatut siunnersuutaa, immikkoortoq 57 itigartipparput namminersortunngorsaanninermi sukumiisumik siammasissumillu oqallinneq suli pinggimmat.